

REGIONAL NEWS**HEADLINES:-**

1. Naktuk Assembly inkhawmah excise & taxation minister Pu Lalnghinglova Hmar-in zu khapna dan siamthat tura rawtna a pulut ang.
2. Mizoram Baptist Kohhran chuan Mizoram Kohran Hruaitute Committee atanga inhnuhdawh an rel a, MPF a tel tura sawmna pawh an hnawl rih.
3. Parliament Budget Session thawh hnihna, naktukah tan a ni dawn.
4. Syria rama inbeihna chhuakah mi sang 1 chuang an thi tawh.

<><><>

ASSEMBLY SESSION

Naktuk hian Assembly inkhawmah excise & taxation minister Pu Lalnghinglova Hmar-in “The Mizoram Liquor (Prohibition) Amendment Bill, 2025.” a pulut dawn a, budget chungchang a tlangpui-a sawihona-in a zui ang.

Ni 3 chhung an chawlh hnu-ah Mizoram assembly inkhawm hi naktuk chawhma dar 10 leh a chanve-ah chhunzawm a ni dawn a zawhna leh chhanna hun darkar khat chhung hman a nih hnu-ah sawi hlawh tak MLP Act 2019 siam danglam tura rawtna bill chu Pu Lalnghinglova Hmar-in a pulut anga, sawiho a ni ang. Hemi chungchanga excise & narcotics department lam atanga thu dawn danin Mizorama thei, buh leh bal leh thlai thar chhuah atanga wine leh beer siamchhuah a nih theihna atan dan dinglai hi siamthat a her rem tum a ni. Mizoram thar chhuah hian grape chauh ni lo, balhla, lakhuihthei, sawhthing, dragon fruit, sapthei, Zobuh leh thil dang wine leh beer siam theihna ang chi atanga siam phalna atan dan hi siam that tum a ni a. Mizoram thar atang chauhva siam theih tura ruahman a ni a. Hei hian Mizoram pawnaw wine leh beer siam lakluh phalna a huam dawn lo a ni. Hetih lai hian horticulture minister Prof. Lalnilawma chuan Mizoram thei, buh leh bal leh thlai thar atanga ramdanga hralh chhuah (export) tlak tur wine siam chhuak tura ruahmannan an kalpui thu February ni 28 khan a lo sawi tawh bawk a ni. MLP Act, 2019 siamthatna tur bill hi kar kalta Ningani a minister putluh tura dah a ni vek tawh chungin kohhran lamin an sawisel ni a sawi, zupui leh zutuitling tih chu bill duan chhina pah a nih leh tak avangin MLA-te sem that leh a ni a. Eptu hruaitu Pu Lalchhandama Ralte leh MLA dang pahnih Dr. K. Beichhua leh Pu C. Ngunlanchunga te chuan lo zir chianna hun pe tur leh putluh hun hi tikhawtlai tura an ngenna chu speaker Pu Lalbiakzama chuan house leader Pu Lalduhoma leh parliamentary affairs minister a rawn hnu-ah putluh leh sawihona hun hi a sawn ta a ni. Naktuk hian kar kal ta Thawhlehni a finance changtu chief minister Pu Lalduhoma'n assembly a a putluh, tangka kum thar a hman tur Mizoram budget (2025-2026) cheng vaibelchhe 15,198 leh nuai 76 a tlangpui a sawihona tan a ni dawn a ni.

<><><>

BJP

BJP State President Pu Vanlalhmuaka chuan Mizoram-a sorkar hrawn tawh te'n Prime Minister ruahmannna te hi tha taka kalpui ni se, tuna retheihna a hmachhawn mek tam tak hi nuai bo a ni tawh tur a ni, a ti. BJP Mizoram Mahila Morcha-in nimina Khawvel puma hmeichhiate ni puala hun buatsaih-ah BJP State President chuan thusawiin, PM Scheme hrang hrang kaltlanga hamthatna tam tak dawn tur a tam êm êm laiin dawng lo an la awm thin chu state sawrkar mawh a ni, a ti a. Tun ang renga a kal a nih chuan mi rethei leh haus a inkar pawh a zau telh telh dawn a, hmasawnna rualkhai, mipui sorkar tak tak, mipui te'n an chanvo an chan theuh theih na'n Mizoram-ah sorkarna an chang a nih chuan an thlentir dawn tih a sawi. Pu Vanlalhmuaka chuan dinhmun hniam zawka awm hmeichhiate chawikan chu Pu Modi-a leh a hote tum a nih thu sawiin, kawng hrang hrangin hmeichhiate hmalam thlir chungin hma lak a ni, a ti a. India ram President pawh hmeichhia a ni a, Sorkar laipua Finance Minister pawh hmeichhia niin ,hei lo pawh Union Minister ah hmeichhia an dah nual bawk a ti a,hei hian chu chuan Prime Minister Pu Modi-an hmeichhiate dinhmun chawisan a ngaih pawimawh zia a lang chiang hle niin a sawi a. Hei mai bakah rorelna sangah pawh hmeichhiate tan seat a hauhsak bawk a, tuna PM ruahmannna tam tak hman mek pawh hi hmeichhiate a ngaih pawimawh avangin, hmeichhe hminga dil a ngai ni a sawiin a thlawna eirawngbawlna gas connection ringawtah pawh hian Mizoramah hmeichhe hmingin mi 36,000 hnênah pek an nih tawh thu a sawi bawk a ni.

<><><>

AWARD

Delhi-a Women Entrepreneurship Summit 2025-ah hmeichhe hlawhtling award chawimawina sang ber "Lifetime Achievement Award" chu Pi Meriam L. Hrangchal hlan a ni.

Women Entrepreneurship Summit hi Confederation Of All India Traders (CAIT) leh Association of Direct Selling Entities Of India (ADSEI) te buatsaih a ni a, India ram puma hmeichhe 100, category hrang hrang atangin pek an ni a. Chawimawina dawngtute hi kawng hrang hranga hmeichhia te chawikanga leirem rap tura hmalatu hmeichhe hruaitu thate an ni. Pi Meriam L. Hrangchal hi Vestige Marketing Pvt Ltd hnuaiah Kum 2014 atang khan bul tanin tun dinhmunah Vestige Millionaire Council member a ni ahmarchhakah hetiang member ni thei hmasa ber leh awm chhun a ni . Tunah hian a kaihruaina hnuaiah member nuai khat leh sing 8 vel awmin mi harsa zawk te'n leirem rap ve thei turin theihtawp a chhuah zarah thlatin khel lo in a hnua amite'n hlawh an la mek a, Mizo zinga he chawimawina dawng hmasa ber a ni.

<><><>

BAPTIST CHURCH

Mizoram Baptist Kohhran chuan Mizoram Kohhran Hruaitute Committee (MKHC) atanga inhnuhdawh an rel a, Mizoram People's Forum (MPF) a tel tura sawmna pawh an hnawl rih.

Mizoram Baptist Kohhran rorelna sang ber Assembly vawi 129-na chuan Council of Churches in Mizoram (CCM) chu nikum October ni 27-a alo din takah chuan CCM Executive Committee December ni 20-a thukhawm chuan CCM-a member kohhran 9 te chu MKHC-ah tel chhunzawm tawh lo mai ni se, tiin rawtna a siam a, chu an rawtna chu kumin January ni 28-a Administrative Committee thukhawm chuan ngaihtuahin tha a ti a. Hei

hi Assembly-ah ngaihtuahin pawm a ni ta a ni. Hetih lai hian MPF a tel ve tura sawmna chu Assembly palaite'n an ngaihtuah hnu-ah tun dinhmunah chuan la tel rih loh ni se an ti bawk. Sapupa leh Pu Buanga te Mizoram chhim chan lam an lo thlen ni, March ni 8 chu Kohhrante'n hlung zawk a hman ni se ti a rawtna pawh Assembly chuan a pawm a ni. An thurel dangah chuan Mizote kan pun chak loh avangin Fa nei tam tur a inzirtir ni se, Mizorama ruihhlo leh HIV/AIDS, eirukna leh khawtlang sualna hrang hrang do turin tualchhung kohhran tinah a dotu Committee din tura ngen ni se tih te a tel a, he tih lai hian Baptist kohhran Pastor pension tawh te Political Party-ah thuk taka inhnahnawih lo tur a ngen ni se tih erawh pawm a ni lova. Agenda-ah chuan Mizorama Political party hrang hrang te kalphung leh inrelbawl dan en hian Ram leh hnam siamthat tuma din leh inenkawl ni a an sawi lai hian mipui beisei leh duh dan erawh an pha lo vek niin a lang an ti. Mizo tawng hman dik leh Mizo tawng hman uar kawng a BCM pumpui huapa hmalak rawtna pawm a ni a, hemi pual hian March ni 15 khian BCM Hall Serkawnah hun hman a ni dawn a, Kohhran chanchinbu enkawltu te pawh koh an ni.

Tangka kumthar budget -ah cheng vaibelchhe 132, nuai 74, sing 5 leh sang 6 pawm a ni a. a hmuhna tur hi Kohhran thawhlawm atangin cheng vaibelchhe 91, nuai 27, sing 9 leh sang 3 leh Kohhran Department hrang hrang thawhchhuah tur cheng vaibelchhe 41, nuai 46, sing 6 leh sang 3 niin a punna hi cheng Nuai 708 thelh a ni a, za zela 5 point 63 in a pung a ni.

<><><>

SCRIBE ARREST

Belgian chanchinbumi (photo journalist) pakhat chu silaimu ruak 2 a kawl avangin Lengpui tumhmunah man a ni.

Police atanga Akashvani Aizawl thu dawn danin he chanchinbumi Simon Clement hi Ningani khan Lengpui tumhmunah man a ni a. India ram atanga Myanmar a lut a nih avang leh silaimu kah ruah tawhna a kawl avangin Sairang Police Station-ah Arms Act leh Foreigners Act hmangin thubuai siamsak a ni a. Nimin khan Aizawl district court-ah hruai a ni a, tlai lamah Central Jail ah dahluh a ni. Simon Clement hi Belgium rama Ghent khaw mi, thlalatu niin Journalism Fund Europe chuan an sawi a. Middle East leh khawvel hmun hrang hranga indona leh tharum thawhna hmuna nunaute tawrhna thla la-in chanchinbu lian leh darhzau tak takah a chhuak thin a ni.

<><><>

MIZORAM-ASSAM TALKS

Ramri buai chungchanga Mizoram leh Assam sorkar official-te chu April thla chawhma lamah inbe tura rawt a ni Home department hotute'n Akashvani Aizawl an hrilh danin Assam official-te'n March thla tawp lama inbiak an rawtna chu ngaihtuah a ni a. Mahse, sorkar tangka kum tawp dawn hnaih a nih tawh avangin remchang lovah ngai-in April chawlkar hmasa ber emaw chawlkar hnihna-ah emaw inbiak ni se tiin rawtna an siam niin an sawi a. A hun leh ni tak tur chu la tihchian leh tur a ni thu an sawi bawk . Official-te inbiakna tur hi Assam sorkarin Guwahati khawpui-ah a thleng dawn a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PARLIAMENT BUDGET SESSION 2ND PHASE

Parliament budget session thawh hnihna chu naktukah tan a ni dawn a, thutkhawm vawi 20 awmin April ni 4 thleng neih a ni ang.

Ruahman ang chuan naktukah Union Finance Minister Nirmala Sitharaman-in Manipur budget a pu lut ang a, Manipur Chief Minister N. Biren Singh-an banna a thehluh hnuah he state hi thla hmasa atang khan President's rule hnuiah dah a ni.

Kan Corr sawi danin session thawh hnihna neih chhung hian kum 2025-26 chhunga ministry hrang hrang enkawlna tur sum ruahmante sawihova pass a ni ang a, bill hrang hrang sawiho a ni bawk ang.

Parliament budge session thawh khatna hi Jan ni 31 atanga Feb ni 13 thleng neih a ni a, President Droupadi Murmu-in house pahnih thukhawm hmaah thu sawiin Finance Minister Nirmala Sitharaman-in Feb ni 1 khan Union Budget a pharh a ni.

<><><>

SYRIA CLASH

Syria ramchhung tuipui kam biala inbeihna thlengah mi sang 1 chuang an thi tawh a, an zingah hian civil mi 745 an tel a ni. Buaina hi March ni 6 khan Jableh-ah chhuak tanin Mediterranean tuipui kam bial hrang hrangah te pawh a darh tawh a, Syrian Observatory for Human Rights sawi danin, President pahthlak tak, Bashar al-Assad-a lam tangten sorkar sipaite beia security force mi 16 an thah avanga buaina hi chhuak tan a ni a, sorkar sipaite nen inbeihna nasa tak a chhuak zui ta a ni.

Observatory chuan finfiahna chiah la awm lo mahse thi zingah hian sorkar security force mi 125 leh Assad-a thlawptu hel 148 an tel tih a sawi bawk.

<><><>